

摛藻堂四庫全書薈要

集部

欽定四庫全書

薈要卷一萬六千七百四十三

集部

家藏集卷十四

明 吳寬 撰

詩四十七首

丙午郊祀齋居夜雨獨坐

時予以服不陪祀

春城閉重門夜館耿孤燭嘿坐方悄如柝聲遞相續擁
衾未成眠伴我只僮僕微雨恣飄揚寒花結羣玉員丘
歲有事大駕朝出宿明當還法宮天意亦可卜清道少
浮塵龍車為膏轂郊南只尺地宿麥芽已綠願言同發

榮皇恩被陰谷

次韻詹事楊公齋居兼憶其弟惟立二首

何處清齋三日東倚仰見重檐未忘解帶題字為愛焚
香下簾俗子休云寂寞宿儒合處深嚴月明望斷西野
刺眼青山最尖

莫信瀛洲路遠相望只隔西東長溝碧瀉千丈密樹青
含萬重杜老看雲未足謝家夢草應同早朝還跨高馬

金闕將鳴曉鐘

上元日劉道亨家作同年會

共愛城西此會稀退朝爭步出形闈好風入座初行酒
瑞雪當階故點衣盛世官銜慚未稱諸公名節願相依
從今便作同年錄每遇新春幸莫違

同年會散夜赴濟之

九衢飛雪暗樓臺足馬城西此夜回只尺過門猶不入
尋常勸酒定相推燈光四壁懸明月鼓響千家殷淳雷
宛有眉山風致在清虛堂裏似重來

為王惟顥題米友仁苕溪春晚圖

古今畫法凡幾變顧陸以來皆有傳紛紛衆史後何多
丹青點染徒相絢澹然水墨誰所為直以霜毫付星硯
謝家林下有清風號國馬前還素面間情逸韻覺翛翛
豈似長安水邊見只今破紙蟬翼如一足猶勝好東絹
楚山清曉別有圖當時曾入宣和殿惜哉畫譜弃斯人
正坐涪翁黨遭譴吁嗟此事亦區區姓名得失何須辯
吳中故物存幾何近歲人家豪奪徧王郎乃獨保藏茲

寄我數回看不倦水遠真從天目山煙深莫辨烏程縣
恍然載我江南游案頭喜有春雲便

二月十二日濟之復邀看桃花和舊韻四首

去歲看來記得真依然樹底踏香塵東園舊羨花開早
屈指猶先廿日春

紅粧半醉倚斜曛細草同裁八幅裙蜂蝶紛紛休共鬧
兩株香粉要平分

花朝何事黯詩魂下馬徘徊嬾入門陌上徒歌歸緩緩

樽前難得醉昏昏

春風次第要花開試看園丁更種來不用詩招熊少府
明年隨意坐蒼苔

送顧生伯謙應舉

南國重臨大比時袖攜書卷過門辭洛京已受丁寬易
吳郡休云顧愷癡賢父設施真是政老夫投贈不成詩
少年雲路呈高手未論秋風折桂枝

觀內閣芍藥

絲綸閣下幾枝紅長許行看數步中獨荷發生應近日
未容零落便隨風品高已作詞林話根老還收藥劑功
若向人家園裏種倚闌安得致三公

追和元危太樸學士游石湖寶積寺

禪堂擁翠總雲岑誤認天平萬石林學士放歌來水曲
道人偏袒坐松陰飲泉別澗多溪鹿啄木空山或野禽
亦欲他年間倚棹繞湖風雨聽龍吟

送黃和仲入南雍

范公園裏重回頭二十年前憶共游壯歲始看登仕路
春風相見在皇州橋門德業爭先進貢院文章豈但收
獨恨南還留未得却憑飛絮繞行舟

酬吳元璧自黃州寄石子百枚

岷江東流幾千里江頭纍纍多石子黃州幸遇蘇長公
怪石得名從此始浴江小兒信手探戲與易之惟餅餌
自云智出兒之上不知兒得從泥滓兒爭啖餅飽而嬉
笑殺先生癡絕矣亦知中有不癡在作供分明立文字

當時若將餅餌供餅餌有盡僧不喜益中五色粲如星
客來只費三升水黃州通守古同宗三十年來況知已
公退閉門無所為偶然興落江之涘遣人拾取僅百枚
寄我封題仍一紙開緘未畢便傾倒數顆猶藏布囊底
我家舊蓄漢銅槃用以盛之稱二美遂令菜圃汲寒泉
頓覺雪堂移矮几日長玩弄暑氣消信哉一段真奇事
但嗟圓滑匪他山漱處安能礪吾齒老狂自效坡仙徒
置我胡為衲僧裏作詩一笑賴誰知石也點頭云有理

他時須更報瓊瑤莫怪匏翁不知止便成後後怪石供
傳世還將文字紀

玉河橋夜坐候朝二首

禁垣迢遞接仙橋歇馬長來候早朝薄霧不遮蓬島月
急湍如湧浙江潮天門燈燭晨光起陰洞衣裳暑氣消
身在翠微宮裏住倚闌誰弄玉人簫

白玉闌邊水氣通涼生高樹總含風河循碣石疑無底
天轉牽牛望正中朝報不聞空羽檄宮僚稀見紙詩筒

亦知夙夜成何補丹辰勞多念聖躬

時禁朝報而遼東有警

鄉僧來京師者多乞一詩而歸蓋皆舊識于山

水間者共十二首

智慤還洞庭興福寺

杖錫過京華西山即是家有時論日月隨處卧煙霞懷
土情終惡還鄉路亦賒春深俞鷗裏應為問梅花

文懷住吳江法雲寺

見說湖心寺人須一葦杭水浮林屋近地限雪灘長挂

衲投禪杖繙經坐講堂邑人多好施應愛道風香

古梅住半塘永福寺

靈鷲山中一樹梅千年古意自西來暗香浮動今何處
應向劉公墩下開

員政住杭州虎跑寺

百花菴裏久栖禪竹樹蕭然野水邊欲洗北來塵土足
扁舟直到虎跑泉

定佩住城東定慧寺

久從玄墓山中隱又向湖州市裏行浮世此身皆可託
應同圓澤話三生

某住石湖寶積寺

碧山落影石湖心詩句從來最易尋為語山僧須管領
他年吾欲載登臨

某還石湖治平寺

湖上何年開寶坊峭峰為壁樹為堂地高已與諸天近
何處人間是上方

宗全還七寶泉

細飲山根七寶泉北來還上五湖船大方游徧渾無滯
佛法胸中已了然

永明還法華寺

吳西山水尤佳處舊有蓮宮號法華歸去緣知添嫩竹
到來猶記裹新茶

真慎還玄墓寺

諸徒祝髮總嘻嘻正是山門復盛時預約舊游須再到

好磨蒼壁待題詩

文鄂住文殊寺

文殊蘭若今何在說在陽山箭闕傍入定不知風雨過
白龍應向鉢中藏

戒香歸洞庭福源寺

扁舟何處發遠自北都還若住人間世無如湖上山孤
雲仍兩角此地少三斑橘柚能供稅秋深便掩關

為文宗儒題鈎勒竹

碧玉參差望若空高枝疑在月明中百年寫法今如許
為憶君家石室翁

為王古直題畫寄其鄉郭筠心

赤城霞氣映柴闌筠石翛然屋數間堆案有書誰共較
過門惟許謝方山

送宗儒

南望瑯琊尚鬱然山林重結半生緣未論幽谷能量馬
更話清池有釀泉上邑多年懷異政古官今日荷新遷

秋來海月菴中意莫忘持盃坐短筵

補送呂秉之太僕

典客南行荷美除皆山忽憶記環滁政成有地真堪牧
詩就臨溪尚可漁壽母頻供堂上饌故家長保篋中書
相逢盡是青雲客科第誰從世祿餘

次韻詹事楊公過玉延亭留題三首

退直從容下木天揚雄多病喜新痊楣間舊墨分明在

秋雨頻經洗更妍

高軒重過晚涼天詩癖秋來獨未痊試為續題誰得似
屋梁明月共清妍

槐亭缺處見青天仰誦新詩百病痊秋色解人留款意
小紅疎翠故妖妍

送林同知仲璧赴官惠州

燕都纔識面浙郡久知名合與方州去仍為半刺行涼
風雙旆遠積水一舟輕欲訪東坡事緣知待政成

送楊君謙

子有好學名得之直從幼矻矻忘其疲每以夜為晝誰
令不自愛坐與簡編鬪旋致心腹間有病見脈候鄉人
嘗謂子文筆真似舅欽謨舅也昔養病亦在掇科後七

日儀部官在告月且又服藥未見功具疏遂入奏昨朝
獲俞音顏面喜欲皺西風作新寒南去不可逗相過一
何疎相別一何驟子去固欣然孰與箴老繆惟子有書
癖舍書莫能救譬如病酒人戒飲貌愈瘦何如稍飲之
病去漸復舊子病偶類茲簡編實醇酎茹多仍吐之紙

上發奇秀三年當復來觀子所成就

為都元敬題春山讀易圖

山中春雨過嘉樹如新沐鳥語時復間惟聞磾聲續對此一欣然孤懷浩無欲便攜童冠人詠歸效沂浴歸來亦何事妙意溢春服寤寐羲文間手持一編讀倦倦濟時心願言均發育

謁陵宿昌平學舍

閑門無事謝諸生西舍支牀睡未成樹老不禁風勢急

山高空負月華明連槽疲馬時相齧隔屋羣雞忽亂鳴
安得故人來此宿壁間持燭共題名

還宿學舍

夜深踏月到孤城塵土衣裳一振輕諫議祠空凡再宿
廣文官冷又前迎思家不覺心旌動紀事誰將腹藁呈
肯信身逢長至節三年南望是神京

次韻答陳粹之憲副病中見寄

時粹之分巡貴州都司有黑苗

警之

游宦西南久挈家故居回望隔京華下牀倚杖憑醫藥
把筆題詩散墨花捷報擬聞收旣旣窮搜還見放蚺蛇
祝良定有單車在歸路應循舊轍斜

秋夜餞李貞伯取唐人詩各拈三字為韻三首

光動疎林月似沈小園留客坐牆陰尊中賸有江南酒
拚唱離歌到夜深

灣頭一月繫方舟闕下三年續舊游昨日林亭看寫照
凜然詩骨映清秋

常見揮毫滿鳳池未應白首在留司贈公還用詩人語
天子于今念所毗

嚴布政輓章

繡衣玉敕重分司憶昔公來提學時淺薄空慚當日獎
高明未許後生知省中幾處揚風采闕下頻年候羽儀
萬里蒲陽南望拜墓門春盡草離離

郭僉事輓章

自古皆有死何人能免之病來仍服藥尚冀延少時病

甚不能起猶遺生者悲何況不以病悲亦從可知郭公
官外臺精勤多設施風采振列郡聲名出分司往來江
湖上官事有程期豈是馮河者輕身忘險危傷哉俄須
間遂與此世辭楚水向東去千古從湘累湘累乃自沈
試誦懷沙詞惟昔識公面尚記來京師骨氣頗亦寒或
云數宜奇斯言遂偶中相術能無疑不弔乃于彼託音
聊在茲

家藏集卷十四

欽定四庫全書

家藏集要卷一萬六千七百四十四

集部

家藏集卷十五

明 吳寬 撰

詩三十一首

丁未春試畢送吳中四進士歸省

毛珵貞甫

春榜名高第幾行
自誇毛義出吾鄉
班聯玉陛通朝籍
政試銀臺挾奏章
新製衣冠歸故里
近將舟楫倚迴塘
君恩浩蕩應難忘
仰見門前進士坊

陸完全卿

鄉書高薦赴南宮又見名題甲榜中王弼易編真有得
陸機文賦早偏工身辭霄漢天門近宅傍江湖水路通
却藉君恩為母壽綵衣頻著舞春風

楊錦尚絅

禮闈曾忝校文章筆勢如流欲擅場已向天門看放榜
忽傳恩詔許還鄉畫船得意春風順綵服承顏白日長
為語時人莫相羨晏嬰心不在揚揚

吳鋆汝礪

遠承恩詔許寧親誰似高堂具慶人遠去不勞東道主
暫留真作北都賓賢科始覺文章貴仕版高題姓字新
總道故鄉風物好壯年為國在經綸

次韻任太常過園居四首

暑氣鬱蒸知嬾出肩輿只許到寒家元修席上能供菜
康節車前慣看花尊酒長空非北海冊書相對是南華
醉鄉不識茫茫路始信吾生亦有涯

出土尚嫌瓜蔓短灌畦方愛井泉深門前有客馬常繫
牆外誰家屋俯臨未必市朝生俗狀只應魚鳥識閒心
好山移得聊相欵階石纍纍總碧岑

卓午風來特地清槐花落處入簷輕高荷久待蓮生子
香草不甘梅是兄倒屣出迎翻失禮解衣留坐更忘情
玉延自是吾家物欲學盧公也爛烹

休笑吳儂故態狂小園日涉步能量閒憑却愛琴微冷
連飲惟誇茗椀香何日歸田成老嬾終年學圃覺清忙

乘涼莫惜重相遇 只待籬邊雨一場

送趙栗夫歸省

生當全盛時仍遇至樂事豈因掇高科不在登貴仕故園寄吳江游釣舊為戲別來餘七年往往入夢寐家有大父母八袞行且至手題數行書昨者附鄉使書云吾衰矣久望汝歸侍汝父母猶壯歸日尚可遲老人風中燭此語真善譬此意豈不知此願獨不遂明主勤萬幾曠職敵有位故緩歸省期俾盡匪懈義而況宵旰間切

切在法吏私情苦難伸如繫千里驥遙望天之南安得
挿雙翅終馬舜文心天下以孝治一朝恩詔頒跪聽殊
足慰又如驥欲奔始脫銜與轡匆匆治行裝舊館視若
奔載感明主恩仍給道里費長河引輕舟連日風更利
鱸鄉適新秋水芳散荷芰日出垂虹橋駢肩看乘駟登
堂問起居稱壽先舉觶此髻者吾兒彼冠者汝季各令
向前拜起立亦以次鄰里爭入門感歎共驚異班白映
錦衣三世一堂備此樂難具陳盡出上所賜努力在他

年圖報端可冀

次韻任太常雨中見寄

矮屋哦詩發長噫前債未償仍後債園中雨急水暴增
滿地江湖失疆界敗牆欲壓走避之早受鄒軻知命戒
只今一雨八月餘小犬隔籬應吠怪簷角俄驚瀑布流
槐梢不見虫絲絃恍然置我吳淞間拍岸風濤殊澎湃
此時此意屬何人只許玉延亭主解天公聊作小兒嬉
來獨何遲去何快晚涼芳草徧池塘一躍青蛙亦嫌隘

褰裳行水過菜畦短杖臨流自疏殺狂風拔樹隔東鄰
却笑呼童氣全憊

對雨

清池水長欲平橋雨勢渾如上晚潮泛泛漸於亭礎近
淙淙真是覓泉遙即看並浴鵝羣戲却恐新生魚子漂
東望菱濠歸去好吳儂家有木蘭橈

送侯主事歸省

聖皇崇至德文母上徽稱有詔恩斯洽先朝例可徵下

臣如挾纊中抱切臨冰覆奏俞音得傳聞孝道興嚴闈
辭舊任散秩荷新升起舞衣裁錦頌來誥織綾飯香收
早稻水落薦鮮菱住占江湖景吟成月露凝刑疑應久
待路轉孰先登六月南溟息風回看大鵬

哀張兼素

當年南去共傷神雪騎冰梁萬里人折檻已回明主意
賜環能愛小臣身忠賢慷慨常相契情事蹉跎獨未伸
廿載心知從此絕豈緣同榜失相親

哀袁德純

對客方談治邑才出門俄送訃音來久知憲節從家過
肯信喪車並海回直氣未舒空奏牘高懷無間便啞杯
傷哉失却青雲器孤寡纍然更可哀

送彭教諭道赴長洲學

先任吳縣學

遠為鄉邦賀得師扁舟南去莫遲遲還從蘇郡更新學
重見胡公舉舊規難弟追思如昨日諸生相候已多時
清門久忝斯文契贈別安能惜賦詩

雨後答邵文敬

急雨過荒園似向城西去豐草覆清池涼風起高樹中懷適欣欣入手得佳句累日苦炎蒸翛然在何處

送琴士楊雲翰還吳

落木蕭蕭墜客衣青天獨鴈向南飛登高徧覽皇都壯話舊常將旅食違卷滿雲煙停綵筆堂虛風露冷金徽鬱林石近婁江水應為臨流作釣磯

送夏司封崇文

蕭然客舍洛陽城
曉拂塵埃識賈生
夜半未承宣室召
秋深重作秣陵行
留司今日渾無事
言路何人獨有名
知是篋中藏舊笏
諸孫應不愧玄成

謁狄梁公廟

在昌平縣西

遠從唐室見賢豪
殿上香煙映赭袍
入夜不憂虓虎噬
向晨休報牝雞號
庭空樹瘦憑誰剖
沙滿溪毛欲自簪
讀罷碑文出門去
史家餘論范公高

謁耶律丞相墓

在瓮山下前有石象贊分三縫其長過膝真異人也

角端人語大兵還帷幄功高掩伯顏身託中原只抔土
神歸朔漠自重關僧伽香火青松盛翁仲風霜白石頑
遺象儼然驚歎久一間空屋倚西山

奉送孝穆慈慧皇后梓宮遷葬茂陵

十二月七日

列騎隨龍輶分官送梓宮戒塗惟吉日繞駕總悲風鉤
弋名殊久軒轅象極崇橋山遷葬地隊道定相通

奉送憲宗純皇帝梓宮出德勝門

十二日

風急揚沙礫皇皇出北門吞聲猶未哭睞目已先昏耕

鑿伊誰力登庸本聖恩晚來龍馭遠雲去鼎湖存

次韻任太常致仕留別五首

歸去如公未當貧清溪碧嶂自為鄰地偏易覺柴門晚
室煖先知布被春書為長觀成故紙衣從新浴少浮塵
集雲山下吾廬在得向今朝置此身

此身真喜置吾廬尚有牀頭一束書海口潮生知進退
天心月到識盈虛已辭朝士誰通訊欲就漁翁更卜居
百里好山俱在眼只教童子導籃輿

藍輿朝出看山初懶學陶潛去荷鉏新法不行誰執拗
舊書無用是潛虛俗人自詫才名盛老態終嫌禮法疎
三月柴門無客到日高閒把白頭梳

濯足梳頭舊有緣更教午睡學坡仙一身自足三間屋
百歲誰增半畝田遇壑便回憂險地看雲高坐愛晴天
朝雞官馬俱無用贏得工夫是晏眠

晏眠不覺過殘冬枕上哦詩倣鮑溶猶喜形骸從小隱
肯將名姓入斜封日中塵滿爭為市樹底陰多獨課農

應笑丁公偏差異夜深腹上夢生松

送趙武靖西征

火雲六月燒長空曠野旌旗相間紅王師未度盧溝水
先聲已撼燕然峰大將臂彎明月弓錦袍銀甲豪且雄
前年一箭定兩廣去年足馬平遼東四夷瞻若在眼底
不知何物為西戎西戎跳舞真狂童此輩置之譚笑中
飛芻挽粟走千里到日且欲蘇疲癃利兵堅甲何足說
自有十萬藏吾胸黃河東偏結巢穴鼴鼠五技依然窮

沙場半夜無馬跡捷書曉入明光宮此行本為報天子
豈意子孫皆上公史臣載筆鸞坡下願紀周宣薄伐功

題赤壁圖

江流東繞千尺堤山鶴上結危巢棲游人夜半放舟過
舉酒試說曹征西征西當年下江許八十萬軍盡貔虎
眼中見慣劉琮徒吳蜀區區何足數舳艤相銜千里連
氣吞劉備兼孫權豈知策士已旁笑笑彼遠來非萬全
長江之險人能共不特阿瞞兵可弄東吳會獵尺書馳

權也難將首親送帳底拔刀軍令行如此奸雄安足驚
周瑜早已借前箸黃蓋何曾論五兵五兵爭如一炬火
北軍敗走南軍坐紛紛燥荻與枯柴乘取便風纔十舸
波濤起立半天紅強虜灰飛一夕空平生親手註孫子
未信水軍能火攻誰云此行纔足恥更聞裹瘡歸淯水
玄武池頭計已疎銅爵高臺聊自起當今四海如一家
三國爭雄真可嗟尚想綸巾巡壘堞猶將折戟洗泥沙
武昌夏口東西路畫史分明入毫素空餘赤壁付遊人

贏得坡仙兩篇賦

分韻得老子壽楊詹事六十

當代文章伯致身何太早長趨白玉墀獨立紅雲島逍遙館閣間屢見書上考試問今行年六十不稱老孰云進獨難鬢髮全未皓賓詹畧舉步前路到師保平生胸腹中所有希世寶光怪時吐之把玩驚浩浩藉之千金箋當彼五色繅持以示世人片語莫能造常恨羣經殘矻矻肆探討紛然註疏家舊說欲一掃其間孔壁文尤

謂顛且倒芳牽與後綴務使句完好遂令伏生徒口授初具藁我願天扶公精力免枯槁長留人間世立論自羲皞書此以壽公餘事無足道

劉文安公輓章

裕陵初策士高步入詞林科第前無幾聲華直至今唐人當陸贊漢代失劉歆碧海瀛洲遠青藜夜閣深義經千古學宋論一生心制虜無三表匡君有六箴紫垣初秉筆白髮未盈簪自負心如水曾期汝作霖瘁躬方几

几盛世已駿駿俄作前楹夢難將惡石鍼禮官公謚議
士類雜哀吟墓有新題石家餘舊賜金斯文成落莫吾
道付浮沉後輩夫何恃先民最所欽玉堂佳話在談者
欲沾襟

家藏集卷十五

欽定四庫全書會要卷一萬六千七百四十五

集部

家藏集卷十六

明 吳寬 撰

詩三十一首

戊申燕九日

正月十九為元長春丘真
人生辰京師人為會甚盛

京師勝日稱燕九少年盡向城西走白雲觀前作大會
射箭擊毬人馬吼古祠北與學宮依簫鼓不來牲醴稀
如何義士文履善不及道人丘處機

次韻徐仲山上元夜過飲

坐閱年華復看燈故人今夜喜新增頻呵凍筆冰花少
緩酌深杯酒面澄身在社中應我老名揚海內更誰朋
每逢令節成清會只恐豪門總不曾

次韻文宗儒上元夜飲歸

佳節相邀入醉鄉夜深誰肯宿茅堂高懸應恨油燈暗
細嚼聊供粉餌香即席從容移筆研出門顛倒執衣裳
何時更慰清寒苦一舉仍須累十觴

送董尚矩使朝鮮

聖主新登寶位高儒臣寧肯歎賢勞天朝雨露隨黃紙
海國雲霞映錦袍周室受封箕子遠漢廷陳策董生豪
史編有待歸無緩憑仗春風送節旄

送王漢英給事充副使

高步黃扉見俊人使輶恩詔動青春關門緩度風霜少
島嶼遙瞻日月新歲久禮儀存制作路長民俗待諮詢
百年候吏前驅慣鴨綠江頭不問津

送劉景元使安南

元年新建總熙熙詔下恩光及遠夷劉向暫辭天祿閣
王褒空拜碧雞祠離筵有酒杯重覆歸路無金橐可垂
應向交人談聖德越裳白雉謾云奇

送呂丕文給事充副使

賜衣新著歎光華畫舫春風散鼓笳天上詔書頒絕域
浙東科第出名家朝廷正闢求賢路給事初乘奉使槎
不是相如還蜀日前驅誰向里人誇

彭祖觀井圖

賈客適江海洪濤渺無津忽焉颶風作舟楫竟漂淪
叟川上浴何殊白鷗馴寧知有飢鰐俟汝水之濱履危
信多險處坦終無屯所以下堂戒名言推子春鬱然大
樹下誰寫彭祖真飄蕭白鬚髮千年貌如新草間者培
井蛙股諒可伸保身乃至此壽合希莊椿古人不可作
故事從誰論此老飲水活應仗汲井人且彼欲往觀人
當置車輪中心宜怵惕豈徒保吾身聊成一轉語圖畫
固有因茲事有與無不須吾重陳紛紛奉遺體足以驚

凡民

次韻顏澄之與文宗儒同游香山

香山西望亂雲橫
冒冷能騎瘦馬行
只許兩人同一笑
如從九老話三生
泉多細品煎茶味
林密微聞伐木聲
應訶金闕通籍者
朝衣清早入皇城

清明謁陵值雨留昌平學舍

朝來好雨徧春城
足馬誰憂阻去程
陵墓百年神屢降
藉田三日禮初成
崇桃積李詩家景
綠野青山畫障情

學舍高眠無一事又題祠壁記清明

次韻楊侍郎吏部後園看花二首

雨脚前朝信似麻馮闈物色徧京華要知吏部庭中樹
不放平章宅裏花

大手年來罷草麻揮毫重喜近文華公門桃李今如許
總被春風盡著花

觀耕耤田

春郊風動綵旗新快覩黃衣是聖人盛禮肇行非自漢

古詩猶在宛如幽朝臣共助三推止野樂全勝九奏頻
稼穡先知端可賀粢盛不獨備明禋

初開經筵

蓬萊晴旭照璇題衛士成行陞楯齊朱戶洞開通上下
絳衣列侍隔東西報經訓志臣恭盡負宸虛心聖敬躋
淺薄不堪叨盛事愧將周賚手親攜

答濟之約游西山不赴

西山佳處約同登舊學登山法頗能莫笑曉來風雨阻

卧游詩句也堪謄

再答

蘇門長嘯說孫登小技平生亦慣能此後山行難再約
史書堆案要抄謄

三答

詩家山路說登登風雨蕭蕭便不能若說累年詩券起
字多須用倩人謄

與葉翁游小南城

長街塵土日隨人不見青青草色新北闕嵯峨聊暇日
南城迢遞故尋春寺僧供茗當為添野老擔花勝賣新
欲訪遼金舊時事百年何處有遺民

送潘栗夫憲副陝西提學

嗟我同年友多分泉事清衣如內臺製簪向法冠橫乘
傳非無例書銓孰有名紛紛來蜀道往往說潘鄉萬里
驅馳地三年報稱情心勞隨使節蹟遠涉羌城子產游
鄉校文翁載史評士風從此盛公議自然明啓事山濤

具詞頭賈至行趨朝逢異數遷秩荷殊榮新政頒應滿
高官界不輕人才供造就仕路厭將迎有待文班接重
看學政成憑誰到西陝先為賀諸生

送徐季止

邇從吳門至起蹟南宮坊儒冠滿塵土京國初觀光早
年富文學下視舉子場蹉跎乃至此宿志猶未償遠來
亦堪喜有兄官職方一見季氏面歡然態如狂秉燭屢
相對頗怪夢寐長紛紛同來客寢食各有妨獨於下馬

日曾不殊家常有姪已進飯有僕爭施牀試言仲氏意
遲子葺高房青山映金闕西戶正相當引子數共登把
酒還自嘗嗟我忝交契累在尊俎傍感此友于樂鬱悶
隱中腸已畢內廷試復治南雍裝天風滿寥廓仰望孤
鴻翔上林多嘉樹回翅期成行

送賀御史出守蘇州

吳民方切九重憂祖道休將五馬留朝著久稱才御史
封疆還屬古諸侯香凝燕寢韋郎詠舟過花橋白傅游

我忝郡人無以頌擬叨循吏傳重修

送西指揮分守汀漳

坐却東夷二十年平生文事欲兼全兵曹屢薦聲名久
海道遙分號令專玉帳清風開筆陣水犀波靜艤戈船
班超自有封侯相寵詔重期萬里傳

為周郎中公瑞題觀蓮圖

玉井蓮開花十丈此事詩家徒自誑何處池頭有此花
分明蜀錦裁成障清波渺渺波洋洋水榭人疑坐天上

白羽風輕頻自搖紅粧日出間相向畫工作此待誰題
意匠欲追崔子西平生比德是君子耶溪不擬定濂溪
濂溪舊有愛蓮說意見豈與坪雅齊溪流一派接雙井
雲孫早躡青雲梯公瑞雙井人

送原已還南京分依字韻

溽暑猶未退頗覺槐陰稀棲燕久相識鳴蜩靜還飛昨
者冒江雨遠來自京畿重念父親意時時欵我扉晚涼
理舊話海月流清輝西堂設卧榻夜永風褰帷惟子官

醫院績美誰能譏入朝復陞見只尺瞻天威銓曹已書
最旅舍仍言歸諒亦戀老拙所重定省違幸哉被封典
恩光照庭闈白頭自足樂無勞製斑衣行旌向晚動酒
盡情依依

中秋夜登仲山新樓賞月

天街東來喜橫亘夜靜無塵斷車乘青天故遣月娛人
特為中秋光轉瑩昔人徒訝一分虧此物始知千里徑
團團餅餌家家如矮屋仰觀殊不稱望裏撐空木最高

上施平板還加釘已好樓居仍好客主人引我凌飛燈
解衣褫帶重延留案上珍腴已先飭須臾衆客報齊來
一笑頓忘腰折磬庾公故事擬重修亦復平生無淺興
少焉月轉簷楹間起傍朱闌時一凭俯觀南苑白茫茫
素練平鋪目難瞑中山地近兔毫分巨海波浮蚌胎孕
舉瓢便可酌河潢著屐那能絕泥濘椽筆誰將華榜題
茲樓只合名超勝置身如在太湖心萬斛龍驤初下砾
端愁波浪欲掀翻為語諸公宜坐定羣童獻技舞且歌

鳳腹空空四絃組我方沾醉陶陶然新調疑從夢中聽
夜深風露忽淒涼高處不勝寒起脰主人歡飲意何濃
美酒如泉瓶未罄底須隔屋問西鄰走送茶瓜勞僕媵
明年未省在誰家鄉社佳期當預訂言方脫口客已聞
吐酒閑然爭出應我家海月舊傳名菴外清光長有贋
王猷隔巷每共之今者安知非我贈戲言若大却非誇
薄意頗誠真不佞小園雖說乏樓居早向幽亭設長凳
杜老還教徑掃花范家莫道塵生甌諸公倘許過高軒

就煩執此詩為證

為陳明之題墨梅

溪藤百尺餘慘慘顏色變遂令塵埃中難識冰雪面秋
陽射疎窗晨起偶開卷妙手非補之厯厯花可辨橫柯
彎且枯老幹直不顛天寒北風高滿眼集玄霰

為顧崇善題松溪高士圖

厨裏丹青能變化昔者愷之真善畫依然靈物屬雲孫
仍見生絞堂上挂煙霧溟濛曉不開長松臨磽何年裁

急流噴薄崖石動白晝歛爾生風雷望中秀色參天起
漱滌孤根從澗水何物離離徑寸莖自信山苗難在此
高人獨立意如何想見清暉入腹多支硎山下寒泉側
為憶深林拄杖過

為李賓之題趙大年雪景

故縫斷裂如刻鏤上有雪圖世稀有墨痕隱隱題名存
熟視始知元祐手疊嶂崇巒失翠微高原淡淡留斜暉
歲云暮矣北風急樵舍漁莊俱掩扉疎林寂歷寒鶴返

意中不覺西涯遠海子橋西柳巷深歇馬何時步魚潭

為陸全卿題劉松年香山九老圖

高松大竹生翠寒密林隱隱攢峰巒杳然流水出深谷
新鑿山中八節灘江州司馬不愛官笑領諸客來盤桓
棋枰詩卷各有適適意豈在陳杯盤酒酣耳熟忽起舞
戲折名花斜挿冠趨朝疲繭足非病在野輕健心偏安
櫂門赫赫誇牛李門下黨人分彼此直氣騰騰逼石樓
甘作香山老居士劉侯此圖超俗塵能與九老俱傳神

衣冠雖作山林樣狀貌終為臺閣人孰為胡杲與吉旼
孰為鄭據并劉真二盧張狄總預集居士樂易皆相親
獨憐舊友今何處禹錫微之嗟失身

初謁茂陵

玉冊金根閟澗阿高陵初謁淚滂沱九天載覩星辰近
萬木長哀風雨多豈有衣冠游道路何曾寢殿貯嬪娥
鼎湖瞻望嗟無及空抱烏號夜渡河

史館歲暮書與濟姪和之

高館冰生硯沼堅盈箱公案總陳年法家有事多成獄
史學無能強入編戶外龍文雲氣滿殿頭鴟吻日華鮮
殘冬坐此嗟何補寂寞全勝著太玄

家藏集卷十六

欽定四庫全書薈要卷一萬六千七百四十六

集部

家藏集卷十七

明 吳寬 撰

詩六十一首

李賓之以問白鬚并代鬚答二首見示予鬚偶
如故而鬚已多白因次其韻亦為問答

問白鬚

早年曾咎汝頗憶為文時忽焉白滿把次第行及鬚衰
老固宜爾此理奚待思但恐緣我咎報復未可知嗟汝

今且白白盡何能為及髭更連鬚延蔓還至誰有言試
述答靜聽當支頤

代白鬚答

領下濶濶如美哉映眉髮倩盼未足誇於我或有缺此
閹偶蒙幸彼婦徒稱哲久喜得子依過眼豈云贍子今
自衰老感愴何忽忽白也我既宜豈好為容悅置之勿
復言處世口須呐

再問

與汝少相處到今幾何時汝白胡獨早不及徑寸龜山
苗映澗松物類偶有思草雜誠不忍念汝惟故知買藥
強塗染此事吾肯為獨憐相處日後去當訊誰真能成
我老愛護均雙頤

再代答

先人有所遺身體及膚髮而我處其間微細亦因缺人
生有修短何曾判愚哲惟道或有虧千歲等一輩子尚
忘久要於道能不忽彼髭既如故撚弄自堪悅吾舌雖

已亡臆對猶不吶

清明日園中見杏花初開

疎花寂歷似殘紅病眼摩挲望欲空已恨浥開無細雨
却愁吹落有狂風物華又報清明節人世真成白髮翁
為語天工須索性剩將春色慰人濃

懷林亨大謝鳴治謁陵遇風

天外狂風盡日吹朝陵有客正驅馳冥冥花樹春難見
颯颯塵沙晚更隨官馬不愁迷古轍奚奴應恨挈新詩

歸來尚可誇僚友沾濕猶勝冒雨時

謝安游東山圖

東山高卧如龍蟠天下蒼生望謝安徵書再下翻然起五十不妨初作官征西將軍姓桓者致我胡為居幕下新亭狎視猶小兒流汗何人面如赭北兵百萬次淮淝別墅與客方圍棊捷書已至未終局江上阿玄班我師高懷磊落多長技誰識向來游戲事後世風流強慕之登山也復携歌妓

喜儲靜夫考功自南京至

與子三年別長存耿耿思偶來今日雨又屬暮春時風
度看逾好功名喜未遲吏曹能自署應不數光義

哀原已

濃霜夜隕菊田荒不及根同蔓草長顧影共悲遺二老
歟形偏恨比三殤術留醫案真餘事名列詩家已大方
親友凋零懷抱惡臨風惟有淚成行

哀鼎儀

海濱歸卧歲華新
靜裏焚香獨養神
病勢已除知更健
計音俄到冀非真
不將文字名當世
豈為鄉邦惜此人
路接婁江嗟後死
他年誰與共垂綸

午朝次韻鳴治

衛士成行總面東
朱門傳蹕靜如空
高飛海燕紅雲近
煖入宮花白日中
華蓋逼時瞻北極
袴衣垂處詠南風
銀臺奏罷諸司事
旰食多勞念聖躬

過葉翁看牡丹

吳下移根已甚難七年纔得兩枝看開時况被薰風急
種法還教宿土乾却愛陶盆當石砌未誇華屋薦金盤
主人笑對成佳兆記取花名是壽安

和陸廉伯晝寢次老杜韻

杜老當時句宛然况逢四月稱高眠綠池芳草紛紛積
白日游絲冉冉牽史館何人仍爆直睡鄉無事莫開邊
爐熏已冷茶煙起自笑閒官可質錢

早起次前韻寄廉伯

月黑頻將蠟炬然翻因夜短不成眠趨朝何補君恩渥
出舍聊從吏役牽馬秣未看騰櫪上雞栖誰聽語墮邊
江南一枕無殘夢欲向司農謝俸錢

和廉伯復次前韻斷夜坐

衰年視物更茫然日落尋常索枕眠久坐誰言纔斷絕
細吟翻喜忽聯牽薰風作暑如初伏海月生明又半邊
却恨連牆稀譙集挑燈那送酒家錢

懷王允達不至

翛然風雨作深秋何處江行定泊舟詔下數行曾遠召
書來前月已親收官河淺澁知難進仕路清閒好並游
猶有舊時高榻在掃塵還擬重延留

次韻陳一夔冒雨見過二首

黃酴釄花已狼籍春去荒園空復游芳草池塘猶可詠
石庭風雨故相留呼童繫馬當門扇對面開尊罷酒籌
因話間時真未得一時須為散新愁

獨衝風雨東街口日暮相過意亦竒橋上醉眠成故事

席間高詠得新詩曲闌循徑行須徧矮屋橫舟坐不危
滿目濕雲生暝色請君休信是晡時

待李世賢同游西山未至

隱隱雲初散匆匆日又斜門前繫馬厨下預烹茶已
幸能成約胡為復戀家莫將行樂事終付別人誇

晚至湖上

到湖疑路盡忽復轉林塘雨後添泉脉雲中漏日光新
蒲仍自綠怪柳不成行欲唱吳歌去憑誰覓野航

宿功德寺航公房

山下禪堂向晚登扶筇一笑有盧能飯餘蔬筍收齋鉢
供雜香花映佛燈漢闕乍違同野叟吳音無改盡鄉僧
蒲團睡穩回清夢風雨蕭蕭撼古藤

飲玉泉二首

龍唇歛薄淨無腥純浸西南萬疊青地底洞名疑小有
江南泉品類中冷御厨絡繹馳銀甕僧寺分明枕玉屏
曾是宣皇臨幸處游人誰復上高亭

垂虹名在壯神都玄酒為池不用沽終日無雲成霧雨
下流隨地作江湖坐臨且脫登山屐汲飲重修調水符
渴吻正須清冷好寺僧空自置茶爐

登華嚴洞

緣厓繚繞近青天十步回頭一竦然但覺群峰俱在下
忽臨空洞更無前三年桓榔堅誰鑿半夜莊舟重莫牽
便借石牀逃酷暑白雲為幕稱高眠

還至湖上

湖上尋歸路行行背落暉青山嫌客去白鳥避人飛不
覺過泉暉空勞帶雨衣江南如夢醒仍見水田肥

答廉伯以游西山負約

晚騎羸馬傍湖陰影落澄波數尺深衆樂固知勝獨樂
豪吟長恐壓微吟清高已向金門隱老大其如白髮侵
莫道鄰居難見面間忙須信不同心

聞友人食河豚病發而卒

惟子稟素弱有病常纏身遂能通醫方數與藥裹親衆

醫每謝谷自謂識病真體中苦多熱食尤忌諸辛至如
所飲酒惟愛淡與淳以吳投藥麌未肯一沾唇往為風
所中治療累踰旬恐終誤朝謁歸卧婁江濱一朝有信
至奄忽形離神固知病再作不知作何因嗟哉河豚魚
未足充八珍古人譬莫邪信矣能殺人烹調雖云善發
病莫與倫奈何甘此毒既死目須瞑脯作子美禍冰為
聖俞屯二物尚可食所惡魚無鱗重價爭買致聚食當
初春匪直悼吾友亦惟戒吳民

送沈元中知餘干

父嘗任刑部

南去意何如雲霄舉足初文名從甲榜宦業有刑書北
闕須通籍西江且下車當令遺愛滿不止白公渠

贈僧瘦岡住吳城寶幢寺

古院清如許高岡瘦若何不須居十刹初喜附雙峨宦
滿霜餘柿庭深雨後莎法筵揮麈處先為敵詩魔

芙蓉紫菊圖

芙蓉數枝嬌且新宛然麗人逢水濱靚粧緩步不動塵

曉起清露沾朱唇菊花意態淡可親老圃秋來初卜鄰
其間顏色或不真却立恐遭石丈嗔江州刺史送酒頻
餘瀝豈緣能醉人眼中紅紫紛前陳洛陽何須詫青春
室空未覺詩家貧咄哉二妙誰傳神

為陳副使寫題畫

深林有隙地似與高人謀屋宇四五間豁然對溪流群
山傾如赴白雲出誰收屋中亦何有琴書足銷憂玩之
以終老隱志於焉求憲史富清譽中懷慕前修山林有

宿好橫圖挈同游不惜持示我我意殊相投涼風報秋
信高興歸滄洲

園居六詠

海月菴

雲浪推來白玉盤坐深良夜不勝寒茅檐已盡平生興
何處蓬萊閣上看

玉延亭

薯蕷年來初種成楣間有客便題名憑誰為報坡翁道

我亦能烹玉糁羹

春草池

自笑溝如丈八強兒童莫漫種魚秧謝家詩句空成夢
此夜依然春草長

醉眠橋

陶翁逐客向樽前醉後高眠任自然嗟我作橋容客醉
不妨醒眼看高眠

冷澹泉

似嚼清冰未下鹽天然滋味此能兼隱之日飲分餘瀝
世上貪夫能使廉

養鶴闌

吳下枯篁一束來綱繆牖戶却常開雲霄伴侶休相訝
不是虞人畜鳥媒

為吳吉士克溫題東坡墨竹

坡僕寫竹如作書筆底溢出書之餘書形譬如石壓蟾蜍
俗人不識稱墨猪古來書畫同一法使彼見此當軒渠

密葉濶濶何所如
宛如卧蠶首不舒
濃霜塗幹外筠厚
香粉浥節中心虛
平生妙句真可誦
可使一日無此居
西牕坐對發長嘘
不知有感感何事
豈以文翁方逝歟
雨晴把玩敞吾廬
清風習習搖瓊琚

送文宗儒還滌

官非京尹免臺參
寺版題名也自堪
公事共知心獨盡
直言曾上面無慚
績書驥牝才名出
家寄瑯琊秀色含
觸熱却憐分手去
園亭何日重高談

賀秦修敬八十

扁舟憶泊錫山東十載丰神夢寐中巢父釣竿隨海霧
陶儂笙樂坐松風朝廷錫誥還因子鄉社評詩合讓公
第二泉甘真可釀百杯春酒莫教空

送白侍郎還南京分闕字韻

都城作淫雨連屬從暑月墊溺及四郊高丘抵深窟大
臣抱憂思時事切於骨廝守雖少安中夜心兀兀惟昔
官訥言袞職常補闕至今存奏疏忠儻莫湮沒此來實

稱賀沾濕屢謝謁明主勤萬幾宵旰常矻矻已聞發倉廩豈但謹刑罰有詔戒群工名實期綜核兵曹為卿亞留務不可忽衆賢方滿朝獻納職免越陞辭沐嘉眷朱服映象笏平生盡瘁心官簿積功閥涼氣生新秋方舟待明發召還當不遐臣節益以竭

次韻答費昭霽二首

進講軒書到七篇每瞻紅日海東邊恩承漢代慚何補學擬商賢恐未然天遠冥鴻空慕弋路長疲馬只垂鞭

卜鄰定向東城下對面須將隱訣傳

杜陵休自託狂夫肥遯中園不改圖應笑蒼蠅隨驥尾
誰將腐鼠飼鶴雛晴雲出岫無心計流水當門陽步趨
猶有詩編題四興平生功業豈全無

題石田古松圖謝周月窗治陳宜人病

籠中采掇皆良藥用之不當翻為虛京國名醫不乏人
一日城南逢扁鵲人言用藥如用兵須憑指下難隃度
急攻緩補隨所施信是胸中有方略沉疴脫去不言功

但使危憂變安樂月窗妙術真通靈妙處自得非醫經
金門不肯受官職野服只愛居林垌惠山山下高松樹
願比此樹長青青漱泉食雪仍產藥上有兔絲下茯苓
世人抱病爭取給熙熙黃髮同千齡

重九無菊

佳節喜載臨藉有杯中綠如何籬落間獨少數枝菊遙
遙小南城異品應滿目野人不好事移送何不速無酒
人但醒無菊人尤俗我與陶淵明事事相反覆俗病惟

自知客醉解留宿淵明祇欲眠往往客遭逐黃花有時
衰一賞已自足歲晏色青青牆陰自修竹

次韻賓之重九值雨獨坐

懷麓堂前樹蕭蕭感暮秋閉門逢節序落帽想風流空
負此時酒間登何處樓不須論雨識四野少禾頭是日甲子

次韻鳴治對菊

曉園移送帶煙霏看處詩成韻屢依來使相逢休更問
娛人真覺淡忘歸霜餘未落憐高節月下無言對冷非

誰識城東幽寂者空庭踈雨獨沾衣

謝王主簿送菊

看菊曾為別墅游
鄧村風露六年秋
幽姿入眼猶黃面
晚節驚心易白頭
已歎無錢空復對
何妨有酒自相酬
陡然離落增顏色
更把重陽故事修

為喬姪題謝廷循畫二首

雲中疊嶂翠模糊
深樹茅堂隱若無
莫向昔人論畫品
開窗聊對謝公圖

右春山圖

江湖極目渺無涯蚌蛤隨潮上淺沙開口自甘濡沫老
聒人偏恨是鳴蛙右蚌蛤圖

題石田畫

麌毫濃墨信手寫長卷初開是誰者溪泉山石斷復連
亦着茅亭在林下石翁足蹟只吳中意到自忘工不工
平生所見亦不少但覺一幅無相同僞作紛紛到京國
欲以亂真翻費力我方含笑人獨疑真蹟于今惟水墨
我觀此畫雖率然老氣勃勃生清妍江湖欲尋具眼識

須上米家書畫船

過西苑

松偃瓊臺不受塵
紅橋綽楔記通津
瀛洲水滿分裨海
靈囿垣長接禁宸
虎園久闕空獸簿
龍舟稀泛靜魚綸
賞花未許陪游幸
誰羨賡歌作宋臣

游海印寺次韻鳴治

北風初急避高垣
竹屋清寒且負暄
客喜抱琴仍送酒
僧忙掃地更開門
投閒易度人間世
擇勝真游海上村

飲後題詩多老氣頽然翻覺醉翁尊

哭王允達二首

孤舟遙寄一身危病骨秋深瘦莫支一堅豈勞催死別
九原安忍問歸期夜闌燭盡多新夢歲暮書回少故知
為憶相從今廿載誨言重領是何時

短札馳來病已危牀頭筆力強撐支兼程到此猶難見
萬事從今敢預期徐穉力耕人自薦王良行孝世皆知
百年家學諸孤繼看取遺編手校時

早起

喔喔雞三唱城居類遠村髮隨秋葉落目與曉燈對
案仍呼飯披衣又出門自憐衰朽物終歲謁天闕

聞王古直至東鳴治

長安風雪值殘年又報王猷過闕前塵土不沾京洛袂
冰澌能送浙江船平生蹤跡知忙甚此老鬚眉想皓然
賴有故人相慰藉對牀呼酒夜燈懸

作鶴房

枯篁密葦作房櫳故遣僂禽宿此中
曾見江南多鴨舍亦知吳下有牛宮
綢繆牖戶朝南日倚傍塙墉避北風
莫笑乘軒如衛懿苦寒須念雪園空

次韻沈啓南自治生塙見寄二首

射瀆西行水路斜細論形勢見隆窪宋儒尚作山陵議
郭氏真稱地理家親手銘文鐫白石鄰僧香火傍丹霞
久知詩骨偏強健曳杖何妨閱歲華

倚塙高歌對斷厓鄙人安得此襟懷門深拱木栽培徧

山近浮雲坐卧偕曾子啓予言不妄莊生息我意終垂
司空自有藏身地不學劉伶說便理

喜李貞伯生子

秣陵疎雨作秋涼賀客緣知總上堂奕葉相傳宜李氏
通家有喜是吳郎臺高又復看招鳳書好何曾寫弄塵
萬卷舊藏應會讀任渠嬉戲滿攤牀

遣悶

歲杪匆匆只五旬惡懷偏屬長年人幼兒嬉戲兩頑物

老婦呻吟一病身風急獨瞻烏止屋月明間與鶴為隣
鄉書近報吳田熟此夕愁眉稍覺伸

賦竹慶郭汝文五十

竹似賢昔日聞之白樂天樂天好竹好其德此語雖佳
意未全古來賢者必有壽吾於竹也蓋亦知其然所以
風雨穿其根雪霜壓其肩空園寄傲不肯屈節操挺挺
老愈堅吳門開壽域隱者躋獨先堂上不合生此竹何
人移入圖中懸畫家竊取詩人意以竹比德仍比年松

江之濱地宜此從今種滿數畝田削筠必帶節斫榦當及箇筠可作冠榦可杖杖須入手冠須顛道遙長醉竹葉酒掀髯一笑清風前

謝濟之送橘二首

得月亭邊碧樹攢及時摘實仗園官報君嘉惠如相稱須是閩中荔子丹


黃紅錯落滿雕盤如見珊瑚間木難莫把糖囊名更改齒牙真不帶清酸

西域賈胡以獅子入貢有詔却之次韻鳴治
萬里流沙奇獸去數行新詔滿朝歡須知此物真無益
始信為君亦不難盛世糞田曾却馬他人野鳥自稱鸞
即看重譯皆歸化敵國何方是契丹

次韻陳粹之謁先墓

歲暮寒風透布袍東門血淚灑平皋心穿泉壤三重固
手挿松楸數尺高北闕已承恩典重南山不動孝思牢
顯親却在揚名裏身退能招士論褒

家藏集卷十七



總校官庶吉士臣侍朝

校對官主事臣張培

謄錄監生臣儲夏書

欽定四庫全書叢要

集部

家藏集卷二十一至二十八



詳校官候補通政司經歷臣鄒祚熾

欽定四庫全書

家藏集卷十八

集部

明 吳寬 撰

詩五十五首

送汝行敏守南安

南過虔州山勢回朱旛遙見繞城來
郡中未訖劉昆政
池上猶稱賈至才楓落吳江還
倚棹梅開庾嶺獨登臺
千年漢吏多遺愛此去賢名定許陪

周莊懿公輓章

鎬京遙在望人物久難湮壽俊文還富詩歌甫及申策
名懷得士聽訟信如神淹繫圜扉少超遷薦牘新周官
卿有亞舜世弼為隣畿內逢凶歲朝端遣重臣饑民忙
救援荒政細條陳國史方傳信臺丞又即真京儲須乃
積留務要同寅定辟資宏父司平得準人帝心常在簡
物議始能伸急召將馳使間居已乞身夢歸陽曲路坐
閱秣陵春報主身猶許憂時俗更詢愁遺嗟一老溘逝
恨茲晨鷗典終臨穴良工載琢珉龍章殊赫赫麟子總

振振不忍緣思棗爭誇克荷新尋常蒙見與宿昔幸相
親試誅平生蹟團詞淚滿巾

徐州重修黃樓

樓中不見羽衣人黃堊依然四面新坐使河流循故道
俯臨山石倚長津名邦信美皆吾土勝日登高與衆賓
從此欲傳州守事只須題壁掃清塵

陳堅遠新建黔陽寶山書院

黔陽縣裏推賢令赤寶山前復古祠高棟數間仍舊榜

斷圭三尺有殘碑沅湘杳杳多人物唐宋悠悠幾歲時
日吉登堂陳桂酒迎神須賦楚人辭

王忠肅公輓章

垂紳絕席見孤標正色昌言歷五朝除吏已如崔祐甫
得君寧論李文饒典刑尚有嗟何及壽考無遺幸後凋
百世悠悠存美謚鹽山南望白雲遙

送王存敬知興化分韻得但字

退朝赴西曹勤事流筆汗獄訟方紛爭直以片言斷老

胥抱文書卷舌詎能贊呂侯惟簡孚漢吏或精悍似君
實兼之古人亦何但從來白雲司往往重文翰當君治
獄餘詩句又其冠秀雅超凡塵落紙莫改竄朝士相與
游敬服不敢玩如彼千仞岡鳳翥爭仰看吾蘇昔缺守
政劇孰可幹衆論咸擬君豈為閩郡算一朝見御批光
動姓名煥五馬俄在門腰帶仍已換十年幸相知良會
每連案如何朱夏初置我離筵畔所欣仕途開難顧文
社散作詩賀閩人私懷未須亂

送劉世熙赴四川僉事管水利

行行萬里去分司直到西川欲盡時肯使江流歸灔澦
還看山月照峨嵋外臺總自刑曹出上馬親將御敕持
千古李冰功不廢離堆刊木建生祠

謝仲山送鶴圖

東園白鶴似人長花徑孤栖每自傷粉墨如新初點染
羽毛依舊欲回翔只疑明月還留影却恨空林不入行
對此忽為蘇子歎誰能呼取下高堂

有以廬山千年松遺予者種盆石上蒼翠可愛
眼底依然五老峯離奇數寸亦長松盆中貯水成兒戲
凡上看山稱老慵全節始知君子德小材寧却大夫封
徒苓歲久還如斗拳石空嗟自不容

送鳴治擢南京祭酒

十載台南有卧龍重來史局又相從高名早已揚延閣
宿望尤宜置辟雍六館舊傳唐學制五經今作漢儒宗
鑄京自昔人才盛試看南金總在鎔

送毛貞甫給事赴南京

寂寞園居吏隱兼喜聞新擢一掀髯官當要地斯通顯
名在賢科却久淹脫穎已非人自薦抗章應與職無嫌
頻年為感過從意秋到惟將別恨添

喜雨

北方苦春旱入夏雨亦微俄然見簷溜及午正霏霏散
步荒園中不覺沾我衣草木總欣悅膏沐滋容輝昨者
宿齋戒徧走神祠祈禮官朝入奏獨與皇心違謂此在

朕躬朕當幹玄機宸衷之所至端能動天威今年定有
望吾民應免饑

雨後

池上積雨餘惟聞芳草氣我亦愛韋郎賦詩工五字新
蟬為誰鳴老鶴作人跪吏隱真自兼翛然亦高致

葉翁以叢竹分種因題墨竹謝之

東巷青青早見分歲寒別種共欣欣世間益者成三友
林下賢人詠五君雨過不須論醉日風回時復見晴雲

傳神妙手今難得聊入筠窗翠鳳群

立秋日過蔡士弘太守新軒

高軒早與素秋通庭下修篁共幾叢已鑿西垣延爽氣
更開北牖納清風主人解作投閒計有子真成肯構功
委巷塵埃渾不到留詩何用碧石紗籠

對月

秋月幾回賞獨有今年閒月閒不自知徑度雲霄間清
光賴掩閑孰把槐梢攀欲邀二三友豈為杯酒憚幽抱

未能釋安能得歡顏空庭步百匝悄悄中宵還

楊文懿公輓章二首

詞苑年來失老成越鄉竟去鏡川平史編未就多遺恨
恩典初行已易名海內雄深傳制作尊前蕭散見神情
玉廷亭上留題處手墨如新泣後生

病深趺坐綰朝紳手削封章避位頻吏省却緣儒術重
宮寮偏荷聖恩新羣經自得私抄意小圃能容後樂身
已矣不誇門地盛白頭誰復見楊椿

送何醫養病還松江

旅舍天潢側醫名衆所聞口嘗池上水目望九峯雲慙
母應無恙諸郎定好文莫言扶病去珍劑正煩分

冬至謁陵與黃子敬編修石邦彥檢討宿昌平

學舍

樓頭鐘鼓咽寒風樹杪星河轉碧空百里人家多野外
五陵兵衛滿城中游歌此地諸生在信宿連宵有客同
孤榻擁衾清不寐夜長惟有賦詩功

還至沙河

高陵回望白雲中匹馬南歸從兩童朝旦正臨長至日
昨朝猶起不周風谷深落葉填能滿橋斷層冰結自通
便買村醪成一醉喜聞鄉老話年豐

為屠大 理題石田畫

生紹文許畫者誰石田老人今畫師年來都下家家有
此幅吾知出親手筆意縱橫信所之夾岸翛然已疎柳
溪陰欲度無舟楫萬杙成橋遠相接何處詩人誇瘦驥

破帽欹風粘落葉兩山對峙開高闢豁豁梵宇容千間
半空丹輦勢突兀雪竇天台真等閒老人昔共游虞山
此景彷彿曾躋攀昆湖蕩漾臨几席水繞漁莊凡幾灣
京華十年走塵土看畫分眞能破顏山林在望鳥飛倦
春到江南吾欲還

為張英公賦瑞芝

偉哉定興王卜葬燕山麓墳上穹碑太史文大書平定
交南錄惟王昔統百萬師天子使殄西南夷富良江上

旌旗度生縛渠魁黎季犁伏波將軍立銅柱何如伐石
作穹碑獨憐滅胡心不逐胡雲移平生遺恨無所洩墳
上倏化為靈芝不然天意惜忠義故遣瑞物以表之我
觀世間芝草亦常有誰似煌煌大如斗將門有子復登
壇摘處仍歸曹偉手此芝便合作如意帳下偏裨看指
授豈不見雲中飛報入京師醜虜聞風連夜走

次韻玉汝哭兄

吳東富山水亦復含清暉扁舟昔所造宅舍煙雲微陳

翁喜客至歡飲爵頻揮入夜猶未散水月交流輝久憶
此事在孰知斯人非書來當歲晏仲也慘無依平生友
愛念恨不身南飛惟翁本善士保身已全歸但憐母氏
老孤抱真難為厚祿幸可致諸郎侍庭闈足為膝前慰
少洩胸中悲

歲暮憶亡妻

素帷風動不勝寒魂氣茫茫久蓋棺時到暮年偏感物
身留空舍強從官呻吟尚有遺言在慘惻無如死別難

松竹近窗燈火暗夜堂孤坐涕汎瀾

辛亥上元夜仲山過飲

角燈懸處久生塵
携酒相遇賴故人
率爾杯盤誰主客
喧然簫鼓自比鄰
花枝欲動風為信
雲氣偏遮月滿輪
却歎吾生有涯者
京華又住十三春

對雨二首

西齋閒看雨失與故人期
旱地徐應入浮雲
濕不移簾
稍初上架蘆筍故穿籬案上書籤
亂賡歌有杜詩

晚來猶密雨小徑踏成泥亂雀依簷近踈花照檻低荒園須日涉稚子不時携漸與鄰家隔高林綠已齊

次韻仲山詠兵部芍藥

赤雲司裏隔紅塵手種名花過雨新舊譜未誇金帶品清詞合製玉樓春閨中陳紫空佳味洛下姚黃豈侍臣老眼摩挲湧此物買栽甘作灌園人

題王叔明野艇觀書圖

泊舟野水際不作水嬉謀舟中載書卷隱志於焉求坐

處書在手卧時書枕頭何須有酒飲始足銷吾憂日暮漁翁返臨溪勸少留還乘明月出同向太湖游

為楊應寧僉憲題畫二首

勝地着孤亭翼然臨絕岸杖屢復溪頭斯人來獨憫青松裁已高白石煮應爛詩思逐浮雲峰回忽申斷

久移京口居雅愛江南意步過清風橋歸來甘露寺壯歲難好間宦轍驅人至餘習畫圖間山林遠能致

送陳何兩郎中分行南北慮囚

邇來治獄誰最精陳何二君俱有名手持朱墨發浩嘆
仍為死者求其生豈云藉此以要譽刑罰所貴惟公平
平生讀書真自得呂刑兩字為明清邇來旱災及千里
宸衷惻惻憂吾氓謂茲感召必有自璽書早諭秋官卿
死囚已釋十五六尚恐枉抑連神京遙遙甸服隔南北
一朝妙選令分行行哉星象動貫城此事付託殊不輕
亦知仰副九重意軒車所至無冤聲他時獄案總馳奏
覆視何用煩廷評

夏太常輓章

鳳池宣召荷文皇書藝當年獨擅場

戢嶺遠師王逸少

鑑湖終賜賀知章壇西筆翰傳中舍海上樓船載太常

幽室築成方晝寢誰將前輩擬清狂

太常平生少暇即弄筆札未嘗晝寢

見葉文莊公輓詩序

續和任太常寫懷二首

夢裏生松腹笑蟠三公其奈此公何旁人作鏡冠常正遠使將書字不謗子羨清晨開畫障樂天終夜却詩魔

自聞說到山中景轉覺便宜得最多

便宜多處總無心城裏移居景更深歲月有終還有始
形骸何古亦何今文峯雲起依危壑秀峴風回動遠林
我獨似知山下路抱琴時向夢中尋

送貞伯致仕

引去誰謀及故人買田陽羨遂成真張公洞口終期我
金母橋邊早置身郡志續修知舊事鄉筵初會得嘉賓
百年風節人爭仰笑對秋波白髮新

送仲山使封鄭府

鐘鳴長樂宮丹陛列儂仗盛典欣復行鴻臚曉傳唱國門洞開處使節親手持千里輿懷地遙遙車載馳於茲建王國地亦稱四塞濟水流其南太行峙其北周家為夾輔歲久惟親藩天潢派不遠玉樹支仍蕃將命重分封宜先司馬屬登高舊能賦美譽揚仕錄臨別遙相贈清風歌穆如翛然堪比德真不讓璠璵去矣尚無遲歸哉尤勿緩兵曹有公事子復才不短季札嘗適鄭行裝

猶紵衣要知如今人垂橐只空歸

次韻濟之招仲山酌別

偶值三旬隙堪償十載忙有官原是夏此月豈無陽重
過烟花市長驅翰墨塲不緣持玉節安得解銅章未去
須常會將來孰可量試看王子宅或比鄭公鄉飲處誰
招得行期已坐忘園蔬從嬾摘山果更高裝弄月當花
檻臨風泛羽觴細篁如客瘦獨鶴擬人長使者新恩渥
儒生故態狂陽關莫先唱西出路微茫

答濟之謝送鶴

野人朝扣門抱鶴來特贈謂我有一鶴作配實相稱長
揖謝野人爾言真可聽惜哉荒園名往歲已先定群鳥
百不多我鶴一不少所以為僂禽何曾比凡鳥迎風或
長鳴獨立殊矯矯其子不須和況乃是中表王子所居
處旁有半畝園有園却無鶴雖美何足言呼童轉贈之
入門即翩翩主人亦珍重視若鳳與鶴菴居數延致畜
之勝乘軒客或告主人贈鶴意如何西鄰與吾子平日

必不和。豈不聞諺語不和勸養鵝。養鵝人尚可鶴也。食
更多。主人意不諾。謂爾何善謔。我生與西鄰。自信不相
惡。千歲食已儲。作詩謝送鶴。

食葛秫米飯簡濟之

碗面盈盈紅玉漿。不妨礮魂塞空腸。饑時信矣易為食。
珍品徒然何足當。朝士有誰食糲飯。市人猶自號麤糧。
傳聞吳地今為沼。一飽甘隨鴈鷺行。

濟之和章有菜根滋味好之句。復次韻。

君家菜甕碧流漿飯熟應兼此下觴須是芥根新切稱
未容槐葉冷淘當蘇松欲種無閒地陳蔡相從勝絕糧
詩到却如青李帖朝來能博兩三行

夜讀白樂天詩集二首

何物燈前消夜長一編入手坐焚香俚言却許朱絃和
真味似將玄酒嘗前輩任他為李杜近時知已得王楊

楊君謙携此集來濟之錄畢子從借觀

從今謝絕間賓客晤語惟容白侍郎

目眩天教放夜光詩題涉獵過千章屢逢禹錫兼元稹
不到姑蘇即古杭老恣登臨年有譜病消歌舞藥無方
看渠二事惓惓說生死猶疑未盡忘

讀樂天詩有五十八歸來之句予明年正及其
期遂次韻

五十八歸來歸來未為速嗟我從去年已過六回六秋
盡園亭前衆葉錯黃綠豈不為渠笑此地乃種木舊業
寄吳中有木兼有竹幸哉同樂天我願無不足

王孟端山居圖

花落家僮掃獨遲山居幽興屬王維茅堂借宿如為黍
不用主人烹伏雌

招濟之觀吳穉寫竹

人家於此君一日何可無君家有此語千載不可誣我
生所交好不在五大夫培植力已盡往往折且枯吳郎
玉峯產過我製新圖寫真能逼真墨汁信手塗折者忽
焉長枯者忽焉腴此君人欲見頃刻遂可呼聞君有高

致子猷未曾徂游藝能屈已常願為其徒就觀必有得
背後勝臨摹當令墨竹派乃近在中吳請君即上馬更
勿煩僮奴

晚寢

土牀便偃息溫暖足能伸半晚連長夜三朝隔小春江
南初到夢都下未歸身猶賴間松竹臨窗伴主人

次韻李賓之聞謝鳴治自南京歸得遺腹孫
乞身上章疏揮手返故園依依赤城路望見非里門恐

負無後罪行謀及諸昆鄧攸亦偶爾天道初無言呱呱者誰泣無子乃有孫父兮今何人敢任顧復恩幸哉北山梓延綿此孤根遂令台南族宗祀宛猶存故人聞遠信喜劇向予論感嘆至終夕未覺詞語煩

服山藥湯

吾家玉延亭人比鍊爐步玉延久不裁亭名只如故客從懷慶來老守轉相附土產細搗成楮橐緘且固嚴冬早朝時沸湯滿甌注舉匙旋調飲何物是寒具空腹覺

溫然卯酒真可吐或復好飲茶損耗疾終痼惟此能補
中醫家言不誤豈緣重服食衰質合調護輕身與延年
神僊非所慕此藥初得名宋諱不敢呼更名仍加號本
草為箋註後來陳簡齋乃有玉延賦登亭須滿飲名實
始相副蘇公服胡麻說夢幾時寤

製雪浪石研

鼈磯千丈接蓬萊割取鱉簪帶海苔巧匠旁觀須利器
書家常用豈麤材輕磨玉髓難隨墨淨洗金星不染埃

豈是蘇公齋裏物只供清玩勢崔嵬

送楊君謙致仕

公署席未暖求去何噭噭濟河先焚舟預賣冠與袍我
不更勸子知子意殊牢昨者見章疏陳情欲長號謂臣
心腹間有疾刺如刀自宜鍼石惡不任簿書勞蒙恩錫
封典父母喜俱叨雨露不知感臣豈如蓬蒿壯年可驅
策正合從時髦臣實自知愧奈緣病相遭當道獎恬退
幸爾遇山濤九重遂俯從孰謂天居高郎官信美秩視

之等秋毫未論子所能此足稱賢豪紛紛投牒者群然
赴儀曹其間或衰邁虛名尚貪饕如子真難得識者爭
嘉襯而我復增愧頭顱已霜毛歸心覺愈急如索更加
絢子歸免羈絆檻獸初奔逃昂首不回顧跳舞向林皋
歲暮多冰雪長河阻輶舶河神不世情助子水滔滔舊
宅傍吳市門前是南濠性不耐居處志惟嗜游遨南指
天目山誓將友猿猱歸來必自得有樂斯陶陶發洩胸
中奇文塲戰當鑾多事反自今筆墨肯停操已忘虞卿

愁且著屈子騷

章侍郎綸輓章

前星力輓不辭艱往事猶傳景泰間奏疏爭光須日月
官曹增重抵丘山鑄京天賜餘生樂浙水身從未死還
千古姓名存國史特書誰許後人刪

送李世賢擢南京祭酒

鄉里交游歲月移赤墀黃閣每追隨史家有事垂成日
師席無人獨去時太學賢關惟古制鑄京王業是初基

廿年不踏江南路天遣登堂奉壽卮

送張廷祥擢南京翰林

北闕重來從史事西江仍許慰慈容玉堂地迥神情逸
金匱書成寵渥濃星斗氣衝豐獄劍霜天聲遙景陽鐘
瀛州獨步悠然處喜見龍蟠第一峰

家藏集卷十八